

04 JUN 2002
LEAD MAHATHIR-BELANJAWAN
BELANJAWAN 2003 DIJANGKA DEFISIT

PUTRAJAYA, 4 Jun (Bernama) -- Perdana Menteri Datuk Seri Dr Mahathir Mohamad hari ini berkata belanjawan negara bagi tahun 2003 dijangka mencatatkan defisit kurang enam peratus daripada KDNK.

Bagaimanapun kerajaan akan berusaha untuk memastikan defisit itu berkurangan, katanya pada sidang media selepas Dialog Belanjawan 2003 sesi empat bersama menteri-menteri besar, ketua-ketua menteri, penyokong-penyokong kerajaan dan setiausaha-setiausaha politik.

Dalam usaha untuk mengurangkan defisit itu, cukai mungkin tidak dapat dikurangkan dan perbelanjaan tidak ditambah dengan banyak, katanya yang juga Menteri Kewangan.

Dr Mahathir berkata defisit kurang dari enam peratus bukanlah sesuatu yang senang dicapai.

"Kalau kita dapat 5.5 peratus pun baguslah. Ia bukan mudah," katanya.

Mengenai cadangan mengurangkan cukai korporat untuk menggalakan aktiviti perniagaan dan pelaburan, beliau berkata ia memerlukan kajian samada ianya benar ataupun tidak.

Dr Mahathir berkata insentif untuk menggalakkan pelaburan dalam perniagaan tidak semestinya berasaskan cukai semata-mata.

Terdahulu ketika sesi dialog tersebut, beliau berkata negara perlu mengelak berada dalam belanjawan defisit yang berterusan dan sebaliknya berusaha untuk mengimbangnya semula.

Sambil menegaskan amalan belanjawan defisit berterusan adalah sesuatu yang tidak baik beliau berkata: "Belanjawan 2002 kita masih mempunyai defisit. Kita sudah beberapa kali mempunyai belanjawan defisit. Ini tidak sihat."

"Kita nak budget (belanjawan) ini diimbangi semula, belanjawan berimbang. Kalau tak surplus (berlebihan), belanjawan berimbang," tambah beliau lagi.

Beliau juga berkata langkah mengurangkan cukai tidak akan membantu ke arah mencapai belanjawan berimbang.

"Kalau kita kurangkan cukai sudah tentu kita tak dapat capai belanjawan berimbang. Defisit mungkin meningkat," katanya.

Di samping itu, beliau berkata perbelanjaan pula perlu menepati sasaran belanjawan.

"Kalau kita belanja terlalu banyak, di mana saya yakin wakil-wakil rakyat, menteri-menteri besar minta kita belanja lagi dan banyak lagi dan ada minta ratus-ratus juta, perbelanjaan ini, minta maaf, saya tak dapat luluskan," tambahnya.

"Kita ada belanjawan, kita cuba menepati belanjawan ini," Perdana Menteri berkata.

Menurut Dr Mahathir kira-kira 99 peratus peruntukan dalam Belanjawan 2001 telah dibelanjakan tetapi bagi peruntukan belanjawan 2002, masih banyak yang belum dibelanjakan oleh kementerian-kementerian.

Beliau berharap peruntukan itu dapat dibelanjakan sepenuhnya hujung tahun ini.--BERNAMA

LES OS